

Al è rivât *Noctes Temporæ*: il gnûf zûc di rûl in lenghe furlane di fâ ator di une taule

I protagoniscj a son i Benandants. Il progjet, che si zove de poie de ARLeF e de Region Friûl-VJ, al è stât presentât al assessôr regionâl aes Autonomiis locâls, Pierpaolo Roberti

I Benandants, figuris positivis ma ancje dibatudis, dongje di cui che ju jude te lote cuintri des fuarcis dal mâl, a son i protagoniscj dal gnûf zûc di rûl par furlan di fâ ator di une taule, realizât dal F.Lu.S. Foro Ludico Spilimberghese APS, in graciis dal contribût de ARLeF, de Region Autonome Friûl-Vignesie Julie e cul jutori de Banca 360 FVG. La associazion F.Lu.S. e à volût celebrâ cun chest progjet i vincj agns de lôr ativitât. La idee, peade a strent cul teritori e cu la sô lenghe, si concretize intun invît a jentrâ intes storiis dal passât furlan. Il lengaç dal zûc, di là di jessi un imprest culturâl e sociâl, al devente une maniere par svicinâ i zovins a cognossi lis lôr lidrîs. "Noctes Temporæ - Il zûc di rûl sui Benandants", chest al è il non dal zûc, al è stât presentât al assessôr regionâl aes Autonomiis locâls, Pierpaolo Roberti, di Simone Pasquin - vicepresidente di F.Lu.S. -, che al à scrit il regolament dal zûc, e di Franco Sarcinelli - coordinadôr dal progjet, adun cul president de ARLeF, Eros Cisilino e cul diretôr de Agenzie, William Cisilino.

«Cun cheste iniziative o vin une gnove oportunitât par fâ cognossi la culture e la identitât furlane e par promovi il furlan. In chest câs, lu fasin intune maniere dal dut gnove, mai provade prime, cuntun zûc di rûl. O cjaparìn dentri fetis di popolazion che fin cumò, cu la ARLeF, no vevin mai tocjât. Ancjemò une volte compliments ae Agenzie», al à declarât l'assessôr regionâl aes Autonomiis locâls, Pierpaolo Roberti.

«Zuiâ par furlan al vûl dî doprâ la lenghe, trasmetile e fâle cressi, parcè che une lenghe vive si fevele, si scolte e si condivî, soredut te vite di ogni dì. Il zûc al è sigûr fra lis esperiencis che a rivin miôr a meti in contat gjenerazions diferentis, stiçant la creativitât e creant occasions di incuintri. Cun Noctes Temporæ dut chest si fâs par furlan, che al devente il protagonist de esperience. Par chest, o ai agrât ae associazion F.Lu.S. Foro Ludico Spilimberghese. Graciis a un lavôr lunc e condividût, a àn metût adun un progjet che al puatarà intes cjasis dai furlans no dome la lôr lenghe, ma ancje un patrimoni prezîôs di storie, tradizions e crodincis popolârs», al à marcât **Eros Cisilino, president de ARLeF.**

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail arlef@caltpr.it

Eleonora Cuberli - mob. +39 340 3546890 / Adriana Cruciatti - mob. +39 335 6853775

<<<<<<<<<<<<

«La sfide plui inmagante di Noctes Temporæ e je chê di fâ tornâ a vivi, midiant dal zûc, fats sucedûts pardabon in Friûl, par che i zuiadôrs a rivin a viazâ in chê realtât storiche. In chescj vincj agns o vin colaborât cun tancj ents e associazions cun chê di creâ esperiencis ludichis sul teritori; cheste volte, invece, o vin volût contâ di noaltris, fasint un zûc che al rapresentàs la nestre essence. Al è stât un lavôr corâl, nassût dal contribût di dute la associazion e di altris realtâts come la nestre, presintis sul teritori», al à contât cuntun scrit Pierangelo Spagnolo, president dal F.Lu.S. Foro Ludico Spilimberghese APS, ringraciant la Regjon Friûl-Vignesie Julie, la ARLeF e Banca 360 par vê sostignût il progjet. Il zûc al è za a disposizion e al larà indenant tal so percors di divulgazion intes bibliotechis, intes ludotechis e in ocasion di cualchi incuintri public in program tai mêis che a vegnin.

Noctes Temporæ - ilustrât di Francesco Bisaro, cui contignûts storics curâts di Paolo Paron, lis traduzioni par furlan di Claudio Romanzin e la consulente linguistiche de ARLeF - al è pensât par cjapâ dentri grups piçui di zuiadôrs (di 3 a 5, dai 14 agns insù). I participants a cjapin il rûl di un dai protagoniscj de storie e, cu lis lôr sieltis, a puedin creâ contis di fantasie. Il mont là che si davuelzin lis aventuris al è ispirât al Friûl rinassimentâl: une tiere di confin e di passaç, crosere di popui, lenghis e crodincis. Dopo secui di dominazion spirituâl e temporâl dal Patriarcjât di Aquilee, il teritori al è sot de influence de Republiche di Vignesie, ma al reste viert aes pressions dal Imperi Asburgjic e aes influencis de Riforme protestante.

Ogni aventure di "Noctes Temporæ" e je une narazion: ce che ur capite ai protagoniscj e lis lôr azions si davuelzin intune secuencia di senis che a son i tocs de conte di cemût che a àn frontât la menace dal antagonist. Lis contis si puedin frontâ intune partide uniche (une serade di zûc che e dure 3-4 oris) o spartîlis in incuintris plui curts, clamâts sessions. Ogni conte e je une vicende indipendente, ma al pues jessi interessant lâ indenant cun aventuris gnovis, doprant i stes personaçs e fasint evolvi il lôr caratar e la lôr storie personâl, interpretant i efets des esperiencis straordenariis vivudis intai incuintris precedents.

Par plui informazions: www.noctestemporae.it | info@flussiludici.org | info@noctestemporae.it

Udin, ai 9 di Lui dal 2026

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail arlef@caltpr.it

Eleonora Cuberli - mob. +39 340 3546890 / Adriana Cruciatti - mob. +39 335 6853775

<<<<<<<<<<<<